

# উত্তরফাল্গুনী

BANGLADARSHAN.COM  
সুধীন্দ্রনাথ দত্ত

# শব্দরী

সহসা হেমন্তসন্ধ্যা রূপজীবী জরতীর মতো  
অব্যর্থ ক্ষয়ের ব্যাপ্তি ঢেকেছিল অত্যন্ত রঞ্জনে।  
বরহের অবয়োধে হয়েছিল মিলন স্বগত;  
বাস্তববিবাগী আঁখি প্রেমাশ্রুত মায়াবী অঞ্জনে  
আচম্বিতে সনির্বন্ধ, অচিরাৎ স্বপ্নজাগরুক।  
ফলন্ত নিশ্চিত কণ্ঠে তাকে বলেছিলুম সে-দিন—  
অঘ্রানের অত্যাচারে পাকা পাতা ঝরে তো ঝরুক;  
পথলুপ্ত কেলিকুঞ্জে পড়ে যদি পড়ুক তুহিন;  
শুষ্ক সরোজিনী ছেড়ে উড়ে যাক সপ্তসিন্ধুপারে  
যাযাবর রাজহংস পুলকিত কুলায়ের খোঁজে,  
তবু কিছু হারাবে না। মরণের অমৃত বিকারে  
স্মৃতির মিসরী বীজ মন্বন্তরে যথারীতি ম'জে  
অপ্রমেয় পারিজাত কল্পলতাবিতানে ফোটাবে।  
কাল বৈনাশিক বটে, কিন্তু সে-ও স্বরূপে বিশ্বাসী  
তাই তার গুহাচিত্রে মৃৎপ্রদীপপরম্পরা পাবে  
নিবাত, নিষ্কম্প দীপ্তি। ক্ষেত্রমংকর সে-মহাসন্ন্যাসী  
বৃত্তিবিবর্তিত শূন্যে চ'লে গেলে কর্মের প্রসাদে,  
অনুপূর্ব তীর্থযাত্রী যুগে যুগে পুণ্য পীঠে জ'মে  
ধূমাক্তিত চিত্তচৈত্য ভ'রে নেবে বর্ণাঢ্য প্রবাদে॥

অনেক শতাব্দী কাটে। প্রকীর্তিত সে-কন্দরে ক্রমে  
বাদুড় বানায় বাসা; কালপেঁচা আনাচে-কানাচে  
ইঁদুরের ধ্যান করে; কোণে কোণে অর্ধভুক্ত শব  
লুকায় হিসাবী শিবা; ভূমিসাৎ বিগ্রহের কাছে  
মহীলতা জোট বাঁধে; মধ্যে মধ্যে তুষ্ট জরদগব  
জুড়ায় অম্লের জ্বালা কণ্টকিত দ্বারদেশে ব'সে।  
তাদের পুরীষে, ক্লেদে অতীতের সার্থক প্রতীক  
চাপা পড়ে নিড়ন্তর; নোনা লেগে চূর্ণলেপ খ'সে  
হাসে অস্থিসার শিলা। সুখশান্ত ধনী নাগরিক

কুচিং সদলবলে আসে বনভোজনে সেখানে  
পণ্যস্ত্রীর হাত ধরে; আহরান্তে রংমশাল জেলে  
ভিত্তিগাত্রে চেয়ে থাকে, কলঙ্কিত কবন্ধ যেখানে  
দলে বৈদেহীর উরু; ছেঁড়া পাতা, ভাঙা টিন ফেলে  
সায়াহে শহরে ফেরে। প্রদোষের নির্বেদ বাড়ায়  
বিক্ষিপ্ত অঙ্গার, ভস্ম, অতিক্রান্ত উৎসবের গ্লানি।  
তার পরে হাওয়া ওঠে, শুকতারা হঠাৎ হারায়,  
দুঃস্বপ্নের বিপর্যয়ে নিশি জাগে শুধু অন্ধ হানি॥

৮ এপ্রিল ১৯৩৭

BANGLADARSHAN.COM

## সংশয়

রূপসী ব'লে যায় না তারে ডাকা;  
কুরুপা তবু নয় সে, তাও জানি;  
কী মধু যেন আছে সে-মুখে মাখা;  
কী বরাভয়ে উদ্ধৃত সে-পাণি ॥

খেলে না ফণী দোদুল বেণীমূলে;  
চাঁচর চুলে ভ্রমর গুমরে না;  
অলকে তবু মলয় যবে বুলে,  
বেড়েছে, ভাবি, বিধির কাছে দেনা ॥

ঝলে না কালো চপলা চল চোখ;  
অগাধে তার জ্বলে না ধ্রুবতারা;  
সে-দিঠি তবু রুচির কী আলোকে;  
কী বাণী রহে রহসে ভাষাহারা ॥

বাজে না বাঁশি বেহাগে তার স্বরে;  
গম্ভীরাতে মুরজ নাহি ফুটে;  
অসার কথা তথাপি সে-অধরে  
বেদের চেয়ে গভীর হয়ে ওঠে ॥

উদয়-রাগা নির্ঝরনীসনে  
অতুলনীয় সে-ছল-ছাওয়া হাসি;  
বাসনা তবু, হঠাৎ আগমনে  
চকিত খুশি সে-মুখে পরকাশি ॥

কান্না তাঁর মুক্তামালাসম  
গহন রঙে নহে তো ধূপছায়া;  
তথাপি চাহি উপেক্ষাতে মম  
ভাসুক লোরে বজ্রাহত কায়া ॥

বক্ষে তার যুগল হেমগিরি  
নির্বাসিত করেনি মৃণালেরে;

BANGLADARSHAN.COM

আঁচল তবু অনামা করি পীড়ি  
কী পরিমল সঞ্চে ফেরে ফেরে॥

অতনুতরে করেনি রচনা সে  
ত্রিবলি সিঁড়ি কুটিল কটিতটে,  
সতত তবু ক্ষামার আশেপাশে  
টংকায়িত কুসুমধনু রটে॥

মেখলা-ঘেরা প্থুল শ্রোণিভারে  
মরালসম নহে সে মদালসা;  
তথাপি ঋজু দেহের আড়ে আড়ে  
ক্ষণে ক্ষণে চমকে কী লালসা॥

কদম-রেণু-বিছানো সরণী তো  
সুনাভি হতে ছুটেনি অভিযানে  
কদলী-উরু-তোরণ-সুশোভিত

লঙ্ককাম অমরাবতীপানে;  
বিজয়ী মন তথাপি সেথা থামি  
মোক্ষ মাগে পরম পরাজয়ে।

ভালো কি তবে বেসেছি তারে আমি?  
বিজ্ঞ হিয়া শিহরে তাই ভয়ে?

৬ মার্চ ১৯৩৩

BANGLADARSHAN.COM

## ব্যবধান

তোমারে বোঝার বুদ্ধি আজও মোরে দেয়নি বিধাতা।  
তাই যবে চন্দ্রকান্ত নয়নের কৃষ্ণপঙ্খ পাতা  
বিস্ফারি তাকাও তুমি মাঝে মাঝে মোর মুখপানে,  
আমি আত্মহারা হই, সে-নিগূঢ় চাহনির মানে  
ধরিতে পারি না; শুধু অনুষ্ণে জাগে কত স্মৃতি:  
কে কবে অমনই চেয়ে জাগতিক বঞ্চনার রীতি  
আমারে শিখাল যেন; অমনই পল্লবঘন আঁখি  
অমৃতের আশা দিয়ে পারিজাতকুঞ্জে মোরে ডাকি,  
অনিকাম বিসংবাদে বারংবার হল পশুশ্রম  
পলাতক সঙ্কিলগ্নে॥

একবারমাত্র ব্যতিক্রম

ঘটেছিল সে-বিধির: হেমন্তের উর্ধ্বশ্বাস সাঁঝে  
উদাস্ত কালের পায়ে বিহ্বলীর মঞ্জীর যবে বাজে  
আচ্ছন্ন মাঠের প্রান্তে, পরিব্যাপ্ত মৃত্যুর ছায়ায়  
আগন্তুক তপস্বিনী আপনারে অচিরে হারায়,  
নিস্তৈল দীপের মতো মানুষের নিরাশ্রয় মন  
আছাড়ি-বিছাড়ি নেবে কোনও এক সন্ধ্যায় এমন—  
যুগান্তে, জন্মান্তে যেন—শাপভ্রষ্ট কে এক উর্ধ্বশী  
অন্তর্দীপ্ত উল্কাসম করপুটে পড়েছিল খসি  
অধরার মুক বার্তা মর্ত্যরজে করিতে সঞ্চর।  
সে-দিনে মুহূর্তকাল অবচ্ছিন্ন শরীর আমার  
অম্লান, অনন্ত বীর্যে উঠেছিল উচ্চকিত হয়ে;  
অনাদ্য ওংকারনাদে জেগেছিল প্রতন হৃদয়ে  
চিরঞ্জীব পুরুরবা॥

কিন্তু কোনও কথা কহেনি সে;

বলেনি আপন নাম; সনাতন অন্ধকারে মিশে  
নিঃসংকোচ জৈব ধর্মে করেছিল মোরে সম্প্রদান  
অনির্বচনীয় তনু। ব্যষ্টির প্রাকৃত ব্যবধান

তাই তীর্ণ হয়েছিল নির্বাণের অখণ্ড শান্তিতে;  
মোদের বিশ্লিষ্ট আত্মা জাতিস্মর দেহের ইঙ্গিতে  
প্রাক্তন প্রবৃত্তিপথ খুঁজে পেয়েছিল অকস্মাৎ;  
অসম্ভূতির ঐক্যে ঘুচেছিল বহুর ব্যাঘাত॥

সে-দিব্য মিলনে তুমি অধিকার দাওনি আমারে।  
তোমার বিশুদ্ধ বাক্য তাই মোর রুদ্ধ চিত্তদ্বারে  
বৃথা করাঘাত হানি নিরন্তর ফিরে ফিরে যায়।  
তোমার সান্নিধ্যে তাই ব'সে থামি আমি মৌনপ্রায়  
সৌজন্যের ঘটাটোপে আপনারে পাকে পাকে ঘিরে;  
যে-দিকে তাকাই দেখি নিরাশ্বাস বুদ্ধির তিমিরে  
মোদের বিয়োগধর্মী চৈতন্যের চক্রচর কণা  
স্বতন্ত্র জ্বালার কক্ষে নিরুপায়ে করে আনাগোনা।  
তুমি চাও মোর মুখে, আমি তব মুখপানে চাই:  
এই ভাবি বুঝিলাম, এই ভাবি কিছু বুঝি নাই॥

২ মে ১৯৩৩

BANGLADARSHAN.COM

# প্রতিদান

ওগো গরবিনী, সত্রে তোমার  
যত উপবাসী নিত্য জুটে,  
আমি তো তাদের একজন নই,  
চাব না ভিক্ষা চরণে লুটে।  
তা ব'লে ভেবো না ক্ষুধা নেই মম,  
জানি না অভাব নির্ধূরতম,  
আশা-নিরাশার দোদুল দোলায়  
নামিনি পাতালে, উঠিনি কুটে।  
প্রতিদানহীন দান নিতে তবু  
আসিনি লোভীর সঙ্গে জুটে॥

বহু বার বিধি বহু দিক হতে  
বহু বঞ্চনা করেছে মোরে।  
খনে খনে তবু অলোকের স্নেহে  
জীবন আমার গিয়েছে ভ'রে।  
কপট পাশায় পৃথিবীপতিরে  
বনে পাঠায়েছে অবনত শিরে;  
দ্বৈরথরণে তারই মাহাত্ম্য  
দিয়েছে আবার দ্বিগুণ ক'রে।  
শাপ ও আশিস, সুধা আর বিষ  
একত্র বিধি বিতরে মোরে॥

যদিও আজিকে সম্পদহীন  
পথে পথে ঘুরি মৌন দুখে,  
তবু অরূপের অক্ষয় স্মৃতি  
সঞ্চিত আছে আমারই বুকো।  
আমি জানি কোথা কোন্ পল্ললে  
সোনার সবিতা তিলে তিলে গলে,  
বকুলবনের কোন্ কোণে শশী  
দেখে মুখছবি মুকুরে ঝুঁকে।

BANGLADARSHAN.COM

তারার মালায় যে গণে প্রহর,  
অতন্দ্রিত সে আমারই দুখে॥

যদিও আজিকে বীতনিঃশ্বাস,  
দীর্ঘ আমার মোহন বেণু,  
তবু হয়েছিল সে-সুরে সিদ্ধি,  
যা শুনে ভ্রষ্ট কল্পধেনু  
ফিরে আসে গোষ্ঠে গোধূলিবেলায়,  
চপলতা জাগে রাধিকার পায়,  
মধুমালতীর বক্ষ্যা শাখায়  
উড়ে এসে লাগে সৃজনরেণু।  
দেবতারার রাতে দীপ্ত নয়নে  
শুনে গেছে মোর দিব্য বেণু॥

যেই বিভীষিকা ছায়ার সমান  
ফেরে অহরহ রূপের পাছে,  
বহু বার তার আকার, প্রকার  
ব্যক্ত হয়েছে আমার কাছে।

আমার মনের আদিম আঁধারে  
বাস করে প্রেত কাতারে কাতারে।  
প্রাক্‌পুরাণিক বিকট পশুর  
দায়ভাগ মোর শোণিতে নাচে।  
সমুখে মরুর মরীচিকা ডাকে,  
প্রলয়পয়োধি গরজে পাছে॥

খিন্ন হলেও আমার নয়ন  
দিব্যদৃষ্টি তাতেই রাজে।  
আমি জানি কেন নিগূঢ় বেদনা  
নবপ্রণয়ীর মরমে বাজে।  
নির্মিত আমি পরশপাথরে;  
মৃন্ময়ী হয় সোনা মোর করে।  
জানি উর্বশী চিরযৌবনা  
কারে পরখিতে জরতী সাজে।

BANGLADARSHAN.COM

বুঝি আমি কোন্ নিগম অর্থ  
ইতরের অপভাষায় রাজে ॥

তোমার প্রাণের পরতে পরতে  
যে-অনাম তৃষা গুমরি কাঁদে,  
অনুকম্পায়ী জীববীণা মোর  
ঝংকৃত আজ সে-অনুনাদে।  
অচিন পথের দূতরূপে তাই  
প্রতিদিন এসে দুয়ারে দাঁড়াই;  
অভাবনীয়ের আহ্বান নিয়ে  
অবাক নয়ন তোমারে সাধে।  
নিত্য জ্বালার কলুষকালিমা  
জানি; তাই হিয়া দরদে কাঁদে ॥

নিয়ে যাব আমি তোমারে যে-পথে,  
সে-পথে একাকী যায় না যাওয়া;  
পদে পদে তার কাঁটার আঘাত,  
পাকে পাকে হাঁকে পাগল হাওয়া;  
হিতবুদ্ধির তড়িৎ ঝকুটি  
দূর দিগন্তে উঠে ফুটি ফুটি;  
ভ্রমে আশেপাশে হিংসালু শিবি;  
পশ্চাতে আর যায় না চাওয়া।  
সর্বহারার দুর্গম পথে  
নিয়ামক বিনা যায় না যাওয়া ॥

তবু পরিহরি বিত্তের মোহ  
রিক্ত অয়নে দাঁড়াও নেমে।  
তোমার ত্যাগের দাম ধরে দেব  
অনির্বচন অমর প্রেমে;  
নিয়ে যাব যেথা নেই দেশ-কাল,  
নেই ব্যাধি-জরা, ক্ষয়-জঞ্জাল,  
সত্য যেখানে স্বপ্নসুখমা,  
ভেদ নেই যেথা সীসায় হেমে।

BANGLADARSHAN.COM

স্বার্থপরের অর্ঘ্যের লোভ  
ত্যাগ করে এসে নিভতে নেমে॥

মোদের সম্মুখে নন্দনবন  
আগলমুক্ত আবার হবে;  
রবে পদতলে অলকানন্দা,  
ইন্দ্রধনুর তোরণ নভে।  
রচি ফুলশেজ চ্যুত পারিজাতে  
পীযুষপেয়ালা তুলে দেব হাতে।  
উধাও মলয় দ্যুলোকে-ভুলোকে  
মোদের প্রেমের কাহিনী কবে।  
মোর অসাধ্যসাধনে, মানবী,  
নিশ্চয় তুমি সিদ্ধ হবে॥

২৮ জুলাই ১৯৩৩

BANGLADARSHAN.COM

# মৌনব্রত

আজি ধূলা ঝেড়ে, পুরাতন পুঁথি খুঁজে দেখি  
রচিলাম যত গান, সে-সকলই মিছে আর মেকী,  
নিরুদ্দিষ্ট অতিকথা, নিরর্থক বাক্যের জঞ্জাল।  
বিলুপ্তিত শবাধারে অসংহত, অনাম কঙ্কাল  
পরিহরি অবজায়, মহাকাল করেছে যে চুরি  
প্রতীকের মরমার্থ, অবিকল পদের মাধুরী,  
উপমার অন্তর্দীপ্তি, উৎপ্রেক্ষার নিগূঢ় আকৃতি।  
কেমনে এখন ভাবি কোনও চিরসুন্দরের দূতী  
পেয়েছিল এক দিন অসংবদ্ধ এই ধ্বংসস্তূপে  
অমর আত্মার সাড়া; উচ্চকিত প্রতি রোমকূপে  
অকস্মাৎ জেগেছিল প্রাণদ, প্রণব প্রতিধ্বনি  
এ-বিলগ্ন শব্দচয়ে; অন্ধ অবচেতনার খনি

বৈদ্যুতিক ব্যঞ্জনায় হয়েছিলে ক্ষণেক ভাস্বর?

নৈরাশ্যের নিরুদ্দেশে হারায় কি তাই কণ্ঠস্বর  
যখনই বলিতে চাই আত্মকথা তোমারে, সুন্দরী?

তোমার অগাধ দৃষ্টি থামে যেই মোর মুখোপরি  
সনির্বন্ধ জিজ্ঞাসায়, তৎক্ষণাৎ বুঝি মনে মনে  
এ-বারেও যা গাহিব, যাযাবর কালের লুপ্তনে  
অনর্থক প্রলাপে তা অচিরাৎ হবে পরিণত।

জানি, জানি সুনিশ্চয় এ-বারেও পূর্বকার মতো  
আত্মপ্রকাশের চেষ্টা সর্বসহা ধরিত্রীর ভার  
অনশ্বর অবস্করে পরিপুষ্ট করিবে আবার।

ব্যয় হয়ে বৃথা বাক্য, লজ্জাকর আত্মনিবেদনে  
কাটিবে না ব্যাসকূট। তার চেয়ে তোমার আননে  
এমনই অবাক চোখে চেয়ে থাকা শত বার শ্রেয়।—  
সংক্ষিপ্ত ভাষার শক্তি, নীরবতা অক্ষয়, অমেয়॥

# নিরঙ্কিত্তি

আমারে তুমি ভালোবাসো না ব'লে,  
দুঃখ আমি অবশ্যই পাই;  
কিন্তু তাতে বিষাদই শুধু আছে,  
তাছাড়া কোনও যাতনা, জ্বালা নাই॥

জনমাবধি প্রণয়বিনিময়ে  
অনেক বেলা হয়েছে অবসান;  
বেজেছে ফলে কেবলই বৃথা ব্যথা;  
পারিনি কভু করিতে বরদান॥

এ-ভুজমারো হাজার রূপবতী  
আচম্বিদে প্রসাদ হারিয়েছে;  
অমরা হতে দেবীরা সুখা এনে,  
গরল নিয়ে নরকে চ'লে গেছে॥

অযুত নারী, তাদের প্রতিশোধে,  
জাগায় লোভ হেনেছে অবহেলা;  
সাহারা, গোবি ছেয়েছে ভাঙা পণে,  
মরমহিমা হয়েছে ছেলেখেলা॥

অসূয়া বুকু করেছে মাতামাতি  
ঝড়ের রাতে বিজুলিঝলাসম;  
চিনেছি তাতে আপন নীচতারে,  
টুটেছে মান, উঠেছে বেড়ে তম॥

মিলনে ক্ষুধা মিটেনি কোনও কালে;  
কামনা শেষে মিশেছে এসে কামে।  
অন্ধ আশা রুদ্র বিরহেরে  
ভাববিলাসী করেছে পরিণামে॥

হয়তো তাই তোমার অনাদরে  
আজিকে আমি হই না বিচলিত;

শিখেছি ঠেকে ব্যর্থ ভালোবাসা,  
কালের কাছে অতনু পরাজিত॥

হৃদয় তবু বিষাদে ভ'রে ওঠে  
নিরুদ্দেশ শূন্যে যবে চাই,  
পাই না ভেবে শান্তিতে কী হবে,  
সাধনাতে যে সিদ্ধি হেথা নাই॥

নন্দনের বন্ধ দ্বার, জানি,  
যাবে না খুলে তোমার করাঘাতে;  
অমৃতযোগে প্রেতের কানাকানি;  
ঘুচাবে ভেদ তৃপ্তি-শোচনাতে॥

তথাপি মিছে আত্মসমাহিতি;  
নিরাসক্তি আসক্তিরই ভেক;  
নাস্তি যার পৃষ্ঠে, পুরোভাগে,  
সমান তার বিবেক, অবিবেক॥

আত্মা সদা স্বগত, একা বটে,  
তাই কি হয় দেহের পরিচিতি?  
থাক না তাতে তৃষিত অচিরতা,  
বাকি যা-কিছু, সবই যে অনুমিতি॥

৮ এপ্রিল ১৯৩৩

BANGLADARSHAN.COM

# অহৈতুকী

কিছুই হয়নি আজ। সে কেবল ছিল নিরুদ্বেগ  
মোর ক্ষিপ্র পরশের চমৎকৃত নম্র নিবেদনে;  
অন্তর্গূঢ় আহ্বানের বৈদ্যুতিক রহস্যলিখনে  
উঠেনি উদ্ভাসি তার নয়নের নির্বচন মেঘ;  
আসন থাকিতে পাশে সে-দিকে সে তাকায়ে দেখেনি;  
গাঢ় সদালাপে তার অবকাশ আসেনি বারেক;  
সংবৃত বক্ষের তলে নিঃশ্বাসের রুদ্র অতিরেক  
পদকে পড়েনি ধরা, তার কাছে দুঃসহ ঠেকেনি॥  
কিছুই হয়নি আজ। তবু জাগে কী শোক মরমে:  
অনাথ সাধবীর মতো ধরা যেন ধায় অধঃপাতে;  
নিহত সুন্দর শিব অনুচর পিশাচের হাতে;  
অরাজক চরাচরে উচ্ছৃঙ্খল বিভীষিকা ভ্রমে॥

মনে হয় একা আমি।—পরিত্যক্ত ভিটার জঞ্জালে  
পুরঞ্জীর প্রসাধনী ফেলে গেছে কারা যাত্রাকালে॥

১২ জুলাই ১৯৩৩

BANGLADARSHAN.COM

# মরণতরণী

মরণ, তোমার উদ্দাম তরী  
লেগেছে কি ফের ঘাটে?  
শুনি কি তোমারই বিদেশী বাঁশরী  
তেপান্তরের মাঠে?  
আজ যদি তুমি এসো থাকো ঠিক,  
তুলে দেব সবই তোমারে, বণিক;  
প্রাণের পসরা ফেরি ক'রে আর  
ফিরিব না ভাঙা হাটে।  
মরণ, সোনার তরণী তোমার  
ঠেকেছে কি মোর ঘাটে?

এসেছিলে তুমি প্রথমে যে-বার,  
ভারি ছিল মোর বোঝা;  
বুঝিনি তখনও জীবনের সার  
কেবল তোমারে খোঁজা;  
লোভী পরমায়ু নরনারায়ণে  
বেচেনি তখনও কত নিষ্ফল  
ছায়ার সঙ্গে যোঝা;  
জীবযাত্রার সধূম অনল  
জ্বালেনি মানের বোঝা॥

ছিল যে তখনও আশা কতিপয়,  
মিটেনি কর্মতৃষা;  
শিখিনি অস্তে পরিণত হয়  
পরাজয়ে বিজিগীষা।  
দেখিনি অপার দ্বৈপসাগরে  
মর্ত্যমানুষ একা বাস করে;  
বৃথা প্রাণপণে খেয়াঘাট বাঁধা,  
আঁধারে মিলে না দিশা;  
বুঝিনি সমান হাসা আর কাঁদা

BANGLADARSHAN.COM

স্বপ্ন অমৃততৃষা ॥

আমার প্রেমের অর্ঘ্যপ্রদানে  
অপারগ সে-ও, জানি;  
আমিও বুঝি না সে-মুক নয়ানে  
লিখিত কী গুঢ় বাণী।  
বাহিরে তাকায়ে সে যে দেখে শুধু  
চারিপাশে মোর মরু করে ধূ-ধু;  
আমি অবলোকি তার করপুটে  
দলহীন মালাখানি।  
বকুলফোটানো সে-চরণে লুটে  
ধূলাই মাখিব, জানি ॥

পথে পথে ঘুরে ছেঁড়া থলি পূরে  
যা-কিছু করেছি জমা,  
তুমিই, উদার, দাম দিবে তার,  
করিবে দীনতা ক্ষমা।  
তাই আজি তব শুভ সমাগমে  
পলাতক গান ফিরে আসে শমে;  
তাই মনে হয় মঙ্গলময়  
নিরুদ্দেশের অমা।  
চরণে শরণ মাগি, হে মরণ;  
নাও, যা করেছি জমা ॥

বন্ধু, এবার বোলো না, বোলো না,  
ঠাই নেই ভরা নায়ে।  
দোলাও চেউয়ের দৌদুল দোলনা  
আমার অচল পায়ে।  
নির্বাত পালে ঝড় ভ'রে দাও।  
মাথার উপরে বজ্রে জাগাও।  
মুঘলধারার কুশল ঝাপটে  
ধূলা ধুয়ে দাও গায়ে।

BANGLADARSHAN.COM

পরিবৃত করি মহাসংকটে  
তুলে নাও, সখা, নায়ে॥

৩০ জুলাই ১৯৩৩

BANGLADARSHAN.COM

# অননুতপ্ত

জাগরুক বীর্যের বিস্ময়ে  
ভুবনবিবাগী রথে শূন্যদিগ্বিজয়ে  
যবে যাত্রা শুরু হল যুগান্তের-অলৌকিক প্রাতে,  
সে-দিন আমার হাতে  
মন্ত্রপুত অসি তুমি করোনি অর্পণ।  
আমার জীবন  
তাই কি নিষ্ফল হল তীব্র পরাজয়ে,  
উষর, ধূসর অপচয়ে?

সে-সুদিনে জানিতাম যদি  
জ্বালায়ে মঙ্গলদীপ তুমি নিরবধি  
সন্ধ্যার তোরণতলে ব'সে রবে মোর প্রত্যাশায়  
তাহলে কি উদ্ধত অন্যায়  
লুটাত আমার পায়ে বেণুমুগ্ধ কালীয়ের মতো?  
কালের তস্করসেনা, পিশাচ, প্রমথ,  
আমার অলক্ষ্যভেদে করিত সে সভয়ে বর্জন  
স্বল্পপ্রাণ সুন্দরের সরণী নির্জন,  
তরণের তীর্থযাত্রা নিরাপদ হতই কি তাতে?

তোমার সতর্ক রাখী যদি মোরে সে-দিন পরাতে,  
হয়তো তাহলে  
মোর দিব্য ঐরাবত সংগ্রথিত তৃণের শৃঙ্খলে  
করিত না আজি কালপাত;  
মোর বজ্রাঘাত  
আঁধির চক্রান্তে প'ড়ে তবে বারংবার  
হারাত না লক্ষ্য আপনার।  
অমৃতের ত্যাজ্যপুত্র পরবশ উত্তরাধিকার  
আবার কি ফিরে পেত আপনার গুণে,  
আমাদের দেখা হত যদি কোনও আদিম ফাল্গুনে?

কী জানি, হয়তো হত তাই।  
অন্তত অমন স্বপ্নে মাঝে মাঝে নিজেই লুকাই  
বিরিট ব্যর্থতা যবে নৈশ ভূকম্পনে  
অসংহত ধিক্কারবর্ষণে  
উলঙ্গ আত্মারে মোর চায় নিষ্পেষিতে।  
স্বয়ংবরসভামাঝে তুমি যদি মোরে মাল্য দিতে,  
তবে-তবে-। কিন্তু থাক সে-নিরর্থ কথা;  
কল্পনার কোষাগারে আজিকে যে এসেছে শূন্যতা  
শতমুখ দুর্দিনের উৎকোচ জোগাতে।  
আর মিথ্যা অনুশোচনাতে  
অস্তিম অস্ট্রিয়ার মোর চাহিব না করিতে গোপন ॥

যদি সেই অনবগুণ্ঠন  
তোমার অসহ্য লাগে, করিব না তবু অস্বীকার  
যে-পথে চলেছি আমি, সেই ছিল অভীষ্ট আমার,  
কহিব না যত ভুল, সে সবই দৈবাৎ।  
আমার অনাদি অমা হয় যদি আবার প্রভাত,  
আপনার ভাগ্যনির্বাচনে  
যদি শুধু মোর ইচ্ছা মান্য হয় নবীন জীবনে,  
তবে আর বার  
বরণ করিব, জানি, এ-দৈন্য দুর্বীর,  
এ-উন্মার্গ নিঃসঙ্গতা, উন্মুখর এই বিসংবাদ,  
বিধ্বস্ত রূপের সেবা, অপকু প্রমাদ ॥

আজ আমি জানি-  
বৃদ্ধির বন্ধুর পথে অগ্রগামী হানি, অন্ধ হানি;  
তার সীমামেঘে এসে শান্তি পায় যারা  
নিরিক্ত তাদের বুলি, পাংশু-ধূলি-ধূসরিত তারা,  
পিপাসায় কণ্ঠহারা আমার সমান।  
ভগবান  
তাদের করেছ ক্ষমা কিনা,  
আমি তা জানি না।

কিন্তু তারা নিজেদের করেছে মার্জনা;  
যত আবর্জনা  
পদে পদে দিয়েছিল বাধা,  
ভুলেছে সে-সব তারা; অভিযোগ হয়েছে সমাধা।  
তাদের অন্তরে  
বহিরাশ্রয়িতা নাই; তাই তারা অষ্টম প্রহরে  
চায়, পায় সুষুপ্তি যে-বলে,  
সে নহে যোগ্যতা যার দুঃশ্চন্দ্য শৃঙ্খলে  
মানবতা মরে অপঘাতে॥

যদ্যপি তোমার সাথে  
দেখা হত সময় থাকিতে,  
উন্মুদ্র উষার লগ্নে যদি তুমি আদরে রাখিতে  
তোমার বিশ্বস্ত হাত মোর করপুটে,  
সিদ্ধির অঙ্কুটে

সোনার স্বর্গের দ্বার খুলিত না তবু,  
মোর দুঃস্থ ভবিতব্য রূপান্তর ধরিত না কভু;  
তাহলেও আজ

ধূমকেতুসম আমি করিতাম নাস্তিতে বিরাজ,  
স্বরচিত অঙ্ককার চিরে,  
অসার্থক অপব্যয়ে আপনারে ঘিরে॥

ভবিষ্য রহসে ঢাকা; তুমি আমি জানি না কেহই  
কী ঘটবে কাল প্রাতে। কিন্তু আমি অনুতপ্ত নই  
আর অতীতের লাগি, আবশ্যিক উদ্ভ্রান্তির তরে।  
উচ্চাচ বক্রপথে সারা বিশ্ব পরিক্রমা ক'রে  
যে-জীবন তব পদে পেয়েছে বিরতি,  
তার অসংগতি  
নিশ্চয়ই নিতান্ত বাহ্য, তার ধর্ম অশ্রুপাত নয়।  
তাই পুন প্রাক্তন বিস্ময়  
জেগেছে আমার মনে,  
লেগেছে নয়নে

BANGLADARSHAN.COM

মায়ামুঞ্চ প্রসাদের সুস্নিঞ্চ কঞ্জল,  
দ্বেষ-দ্বিধা-দ্বন্দ্বহীন, অপ্রত্যাশী মোর অন্তস্তল  
জগতেরে ক্ষমা ক'রে লভিয়াছে জগতের ক্ষমা,  
আবার পেয়েছে খুঁজে নবজাত সৃষ্টির সুখমা ॥

৫ নভেম্বর ১৯৩৩

BANGLADARSHAN.COM

# প্রশ্ন

সত্য কি বাসো ভালো?

নয়নে তোমার দেখি যে-রুটির আলো,

জ্বালাবে কি তাতে আরতির দীপ আমার তরে

মৌন, বিজন, মৌল নিশার নিলাজ দ্বিপ্রহরে?

অতীত দিগ্বিজয়

আজি কি সহসা পরাভব মনে হয়?

মাঝে মাঝে সাঁঝে হৃত বিত্তের অন্বেষণে

শূন্যে কি ধায় উদাস হৃদয় চক্ষের বাতায়নে?

আমি এলে খোলা দ্বারে,

ভাবো কি বিগুণ সনিপুণ সজ্জারে?

একা ঘরে ব'সে কথার সহিত গাঁথো যে-কথা,

দেখা হলে সে কি অক্ষম লাগে, সার্থক নীরবতা?

দাঁড়ায়ে আমার পাশে

তাকাও যখন তারাখচা মহাকাশে,

হয় না কি মনে বিধির আদিম চিত্রলেখা

বাখানে সহসা চিররহস্য, সনাতন দেয় দেখা?

মোর প্রেমনিবেদনে

দক্ষ ট্রয়ের কাহিনী পড়ে কি মনে?

অদর্শনের নরকযাতনা জানাই যবে,

বেয়াত্রিচে-সনে একাসনে তুমি বসো কি সগৌরবে?

আমি চ'লে গেলে দূরে,

রম্য ব'লে কি চেনো তুমি মৃত্যুরে?

প্রলয়শেষের সংবাদহীন বিকর্ষণে

ছোট্টে কি তোমার বিশ্বজগৎ নিভৃত নির্বাপণে?

সত্য কি বাসো ভালো?

এলাও, এলাও তবে ও-কবরী কালো।

অনাদি অমায় হোক ত্ৰিভুবন নিমেষে হারা;  
শুধু জেগে থাক নিবিড় নীরবে চারটি নয়নতারা॥

৪ অগস্ট ১৯৩৩

BANGLADARSHAN.COM

## দুঃসময়

মোদের সাক্ষাৎ হল অশ্লেষার রাক্ষসী বেলায়,  
সমুদ্যত দৈবদুর্বিপাকে।  
আধো-জাগা অগ্নিগিরি আমাদের উদ্ধত হেলায়  
সান্দ্র স্বরে কী অনিষ্ট হাঁকে;  
বিচ্ছেদের খড়গ খড়গ কোথা যেন শানায় অসুরে,  
তারই প্রতিবিম্ব হেরি মুহূর্মুহু আকাশমুকুরে;  
বজ্রধ্বজ প্রভঞ্জন রথ রাখি অলক্ষ্যে, অদূরে  
ফুৎকারিছে দিগ্বিজয়ী শাঁখে;  
আসে নাই সঙ্কিলগ্ন, অমা তবু করবী এলায়  
বৈধব্যের অকাল বিপাকে॥

জানো না কি, নিঃশ্বিণী, যদিও বা সত্য হয় আজ  
আমাদের অবোধ স্বপন,  
যদিও মার্জনা করে ঈর্ষাপর ক্লীবের সমাজ  
যুগলের অমর্ত্য মিলন,  
তথাপি নিষ্ফল সবই।—আমাদেরই দুর্মর অতীত  
অতর্কিত ভূকম্পনে বিনাশিবে বিশ্বাসের ভিত;  
প্রেতাকুল ব্যবধানে সঞ্জীবনী বাহুর নিবীত  
চ্ছিন্ন, ভিন্ন হবে অনুক্ষণ;  
অহেতুক অপব্যয়, অনুচিত অর্চনার লাজ  
আস্ফালিবে স্তব্ধ দুঃস্বপন॥

তবুও ফেরার পথ বন্ধ হয়ে গেছে একেবারে,  
কায়-মনে তোমারেই চাই।  
জানি স্বর্গ মিথ্যা কথা, তথাপি অলীক বিধাতারে  
রাত্রি-দিন মিনতি জানাই।  
উন্মুখি হৃদয়সিন্ধু সৃজনের প্রথম প্রভাতে  
অভুঞ্জিত সুধাভাণ্ড অর্পিলাম মোহিনীর হাতে;  
মৃত্যুর মাধুরী কিন্তু বাকি আছে, এসো আজ তাতে  
আমাদের অমরা সাজাই।

অসাধ্যসিদ্ধির যুগ ফিরিবে না, জানি, এ-সংসারে;  
তবু রুদ্র ভবিষ্যতে চাই॥

আধার ঘনায় চোখে, তুমি ছাড়া কেউ নেই পাশে,  
অন্তরীক্ষে জমে বিভীষিকা।

লুক্ক ভবিতব্যতরে রুদ্ধ করো দৃষ্ট পরিহাসে,  
হাতে হাত রাখো, সাহসিকা

তোমার মাইে শুনে হয়তো বা লজ্জিত নিয়তি  
ফিরাবে, অভ্যাস ভুলে, ঐকান্তিক সময়ের গতি,  
মৃত্যুর বিক্ষিপ্ত জাল দিবে বুঝি মোরে অব্যাহতি,  
শাপমুক্ত হবে অহমিকা;

নবজাত ভগবান বিরচিবে কৃতজ্ঞ উল্লাসে  
আমাদের নব নীহারিকা॥

১ অগস্ট ১৯৩৩

BANGLADARSHAN.COM

# জন্মান্তর

আধখানা চাঁদ রূপার কাঠির পরশে  
জাগায়েছে তার মুখে কী মদির কান্তি।  
নিমেষনিহত স্বচ্ছ চোখের সরসে  
ত্রস্তু তারকা সন্ধানে সংক্রান্তি।  
রেশমী কেশের ঘন, কুঞ্চিত লহরে  
ভর ক'রে আছে অনাদি অসীম রাত্রি।  
নিরাশানিবিড় আয়ুর অন্ত্য প্রহরে  
কেন এল আজ অনাহূত বরদাত্রী?

আলাপন তার নিগূঢ় দ্বিধায় ব্যাহত,  
তবু কী মমতা লীলায়িত ভুজভঙ্গে।  
আমারই মতো সে বহু বঞ্চনে আহত,  
মুগ্ধ মিনতি বিজড়িত তবু অঙ্গে।  
সর্বহারা সে, হিয়া ভরা পীত স্মরণে,  
বহির্বিমুখী, দিবসে উলুকী অক্ষ,  
ডাকে অভিসারে আমারে অমোঘ মরণে,  
তবু সে মূর্ত জীবনের নির্বন্ধ ॥

জানি না কী দিব, কী চাহিব তার সকাশে।  
বহু বার ঠেকে হয়েছে আজিকে শিক্ষা—  
অযাচিত দান দাতার দস্ত প্রকাশে,  
দীন ভিখারীর হীনতা বাখানে শিক্ষা।  
মর্ত্যের ক্ষুধা মিটে না মজুরি ব্যতীত,  
স্বর্গের সুখা ইন্দ্রজিতেরই ভোগ্য,  
মোর অসাধ্যসাধনের যুগ অতীত,  
তবে আর কবে হব ও-প্রেমের যোগ্য?

নামুক অরতি অতএব মোর শরীরে,  
কামনার বানে বাঁধ বেঁধে দিক ধৈর্য্য,  
আত্মবোধের অন্তরতম অরিরে

হানুক মৃত্যু মহানিদ্রার স্ফৈর্য।  
হয়তো তবেই নব জনমের প্রভাতে  
অমিত বীর্যে বিধে অগোচর লক্ষ্য  
জিনে নেব তারে স্বয়ংবরের সভাতে,  
সম্ভাবনায় হব তার সমকক্ষ॥

সে-দিনে তো আর হবে না অপব্যয়িত  
কিশোর চাঁদের জাদুকর অভিসন্ধি;  
চিরন্তনীর চিরাভিলষিত দয়িত  
অনাহত ভুজে করিবে সতীরে বন্দী;  
টুটিবে মেখলা, খ'সে যাবে তার কবরী,  
তীব্র পুলকে ঘুচিবে সকল লজ্জা;  
তুঙ্গী গ্রহেরা হবে বাসরের প্রহরী,  
চ্যুত তারাদল বিরচিবে ফুলশয্যা॥

১ নভেম্বর ১৯৩৩

BANGLADARSHAN.COM

# বিলয়

চিকন চিকুর তব হবে যবে তুষারধবল,  
রজনীগন্ধার যষ্টি ওই ঋজু বরদেহখানি  
তাকাবে ধূলার পানে, উবে যাবে রতিপরিমল;  
উত্তর হাওয়ার স্পর্শে ত্রস্ত হাতে অর্গল সন্ধানি  
যে-দিন শুনিবে তুমি পাতা-ঝরা হিম নিরালোকে  
ফেরে মাতামাতি ক'রে আগন্তুক মৃত্যু আর ক্ষয়,  
সে-দিনে দু ফোঁটা অশ্রু গালায়ে কি নির্বাপিত চোখে  
সহসা ফুরাবে তব সন্তাপের অন্তিম সঞ্চয়?

বুঝিবে কি, হে সুমিতা, অতন্দ্রিত সে-অমানিশীথে—  
যে তোমারে চেয়েছিল পূর্ণিমার প্রগল্ভ উচ্ছ্বাসে,  
যদি তারে ক্ষণতরে তব্বী তনু উপহার দিতে  
তিলার্থ প্রভেদ তবু ঘটিত না শেষ সর্বনাশে?  
বুঝিবে কি সে-দুর্দিনে—উদাসীন বিধাতার কাছে  
তুল্যমূল্য আমাদের ধৈর্য আর আত্মবিস্মরণ,  
ম্নয় বিস্ময় চুড়ে নটরাজ অহর্নিশি নাচে,  
চিরপ্রতিষ্ঠার শত্রু ভ্রাস্তি নয়, অমোঘ মরণ?

হেমন্তের প্রান্তে এসে বুঝিবে কি—উত্তরফাল্গুনী  
উদেনি দিগন্তে তব আকস্মিক নির্ভার প্রমোদে;  
ইচ্ছা ছিল তার মনে আসঙ্গের ইন্দ্রজাল বুনি  
সুন্দরের পদবনে মত্ত কালহস্তীরে সে রোধে;  
সে জানিত সময়েরে শুধু গতি পরাজিতে পারে,  
তাই তার মুগ্ধ দৃষ্টি হয়েছিল আবেগে উতল;  
সে জানিত বৃথা বাক্য, জগতের শূন্য অন্ধকারে  
শরীরের রূপরেখা আমাদের অনন্য সম্বল?

নিবিদ ভাষায় যবে নিরাকার নাস্তি বাখানিবে  
অনঙ্গ আত্মার ঋদ্ধি, বুঝিবে কি সে-দিন প্রথমে—  
প্রণয়ের জয়স্তুম্ভ ঠেকে গিয়ে যদিও ত্রিদিবে,

বন্ধমূল ভিত্তি তার তবু কাম-কারণ-কর্দমে;  
নিরাকৃত মানবাত্মা অঙ্গারিত সৌর তেজসম  
নিঃস্বপ্ন নিদ্রায় মগ্ন ইন্দ্রিয়ের প্রাক্তন খনিতে,  
উন্মুদ্র প্রবৃত্তিমার্গ পারে শুধু ভেদিতে সে-তম,  
পারে শুধু দাহ্য দেহ দীপ্র বাণী তারে ফিরে দিতে?

যবে কায়-মনে চাবে নিরুদ্দেশ বসন্তসখারে,  
নিঃশেষিবে ক্ষীণ শ্বাস নাম, শুধু নাম উচ্চারণে;  
যাত্রার উদ্বেগে যবে ভাবিবে, সে খেয়াঘাটপারে  
পরাবে মন্দারমাল্য তব গলে প্রেমাভিভাষণে;  
তখন স্মরণ করো সে জানিত কোনও খেয়া নাই,  
ডুবে যায় মৃত্যুতরী জনহীন দ্বীপের সংঘাতে;  
জন্মপরম্পরামাঝে অমৃত সে খুঁজেছিল তাই,  
স্থাপিতে পারেনি আস্থা নিরালম্ব, নশ্বর আত্মাতে॥

১৩ নভেম্বর ১৯৩৩

BANGLADARSHAN.COM

# মহানিশা

মরণ, তুমি তো আসিবেই এক দিন,  
এসো তব আজ বেগে।  
দশমীর চাঁদ আকাশে তন্দ্রাহীন  
ভর ক'রে আছে বীতবর্ষণ মেঘে;  
সুদূরের হাওয়া কোথা নারিকেলবনে  
কার আহ্বান নিবিদ ভাষায় ভণে;  
রজনীগন্ধ রয়েছে কী প্রয়োজনে  
প্রচুর পরাগে জেগে;  
শুধেছে বিধাতা চিরজীবনের ঋণ;  
এসো, হে মরণ, এসো আজ দ্রুত বেগে॥

আজি প্রেয়সীর সুরভিনিবিড় কেশে  
দেখেছি তোমার ছায়া;  
চিনেছি যে তার অযাচিত আশ্লেষে  
কত বিমোহন তব বিরতির মায়া।  
এখনও শ্রবণে ধ্বনিতোছে অধিকার  
গাঢ় কণ্ঠের নিরুপাধি ঝংকার;  
স্মৃতিসঞ্চিত ঘন চুম্বনে তার  
এখনও শিহরে কায়া;  
এখনও জগৎ লুটে মোর পাদদেশে;  
ঘনাও, মরণ, এই বেলা তব ছায়া॥

কী জানি, হয়তো, কেবলই স্বপন দেখি,  
ফুরাবে সকলই প্রাতে।  
প্রগল্ভ পণ অনাহত রহিবে কি  
প্রতিদিবসের প্রচণ্ড সংঘাতে?  
দেবদুহিতার ধূলামাখা খেলাঘরে  
ভাঙা পুত্তলি প'ড়ে রব অনাদরে,  
তবু লোভী কাল দৈব কোপের ডরে  
লবে না আমারে হাতে।

BANGLADARSHAN.COM

মদির নিশায় ভিক্ষুরে অভিষেকি,  
অনুশোচনার জুলিবে না সে কি প্রাতে?

তার চেয়ে ভালো আজি তব রসায়নে  
আদি ভূতে ফিরে যাওয়া,  
শুরু শশীর শাশ্বত বিকিরণে  
খোলা বাতায়নে সুপ্ত সে-মুখে চাওয়া,  
মৃদুল মলয়ে বরতনুখানি ঘিরে  
কম্ব কামোদে কামনা জানানো ধীরে,  
ধূলিরেণু হয়ে ঢেকে সারা পৃথিবীরে  
তারণ চরণ পাওয়া,  
ঈর্ষা জাগায়ে পুরুরবাদের মনে  
এ-মহানিশায় সনাতনে মিশে যাওয়া॥

৩ অগস্ট ১৯৩৩

BANGLADARSHAN.COM

# জাগরণ

মিলননিবিড় রাত্রি পরিকীর্ণ নিখিল ভুবনে;  
বিরাজে প্রশস্ত কক্ষে তারই শান্তি, তারই নীরবতা;  
চাহি খোলা বাতায়নে, দেখি তারই অনাদি বারতা  
মর্মরিছে মুহূর্মুহু স্বপ্নাবিষ্ট দেওদারবনে॥

নাই সে-নিভৃত লোকে নগরের উগ্র উতরোল,  
মর্মভেদী পরচর্চা বিষায় না যমকজীবন;  
অলক্ষ্যে অলস নদী করে শুধু নৈশ সংকীর্তন,  
কিংবা সে নিদ্রিত, শুনি দূরাগত কালের কল্লোল॥

উদার অলকানন্দা হয়ে গেছে মহাকাশ পার  
ছড়িয়ে নক্ষত্র-ফেনা; বেঁধেছে অসংখ্য জোনাকিরে  
রজনীগন্ধার গুল্ম; সম্মিলিত তাদের মির্মিরে  
মনে হয় অমাবস্যা সুদক্ষিণ, সজীব, নির্ভার॥

তোমার চিকন দেহে বিজড়িত কী দিব্য কুহক;-  
ভাস্বর অলঙ্ক কটি, দৃষ্ট কুচ, নিঃসংকোচ উরু,  
অধরে সিতাভ হাসি, মুক্ত কেশে উথলে অগুরু,  
সাবলীল আত্মদান স্নিগ্ধ চোখে এনেছে বলক॥

দেখিতে পাই না কিছু। তবু যেন হয় অনুমান  
অরূপ আনন তব চিত্রার্পিত অপূর্ব প্রসাদে,  
প্রতি অঙ্গসন্ধিমাবে নম্র ছায়া কল্প নীড় বাঁধে,  
সঞ্চিহিত গভীরে তব নিঃশ্রেয়স, নিবৃত্তি, নির্বাণ॥

তন্ময় আমার চিত্ত, প্রীত বুদ্ধি, তদগত শরীর,  
তথাগত অন্তর্যামী আত্ম-পর সবারে ক্ষমেছে,  
ব্যক্তিতার অবরোধ মুহূর্তেকে চূর্ণ হয়ে গেছে,  
সার্বভৌম যৌবরাজ্যে প্রত্যাগত যযাতি স্থবির॥

সাক্ষ কি সহস্র বর্ষ? গর্জে নিচে প্রচ্ছন্ন নরক,  
পরশ্রীকাতর ইন্দ্র উর্ধ্ব হতে করে বজ্রাঘাত;

চমকে নয়ন মেলি, তমিস্রার আবিলা প্রপাত  
ডুবায় স্বপ্নেরে মোর; শুরু হয় ধৈর্যের পরখ॥

সুপ্তিশান্ত গৃহদ্বারে হানা দেয় বিনিদ্র নগর;  
সচকিত নিঃসঙ্গতা বাহুপাশে হরে মোর শ্বাস;  
মহুর কালের স্রোতে স্তূপীকৃত হয় সর্বনাশ;  
মোদের বিচ্ছিন্ন করে মৃত্যুপম ব্যবধি দুস্তর॥

১৭ নভেম্বর ১৯৩৩

BANGLADARSHAN.COM

# মাধবী পূর্ণিমা

দিনের দহনশেষে সাকীসম সিত সুরা ল'য়ে  
মাধবী পূর্ণিমা যবে দেখা দেয় মোর বাতায়নে,  
আত্মধিকারের জ্বালা শত গুণ হয় সে-সময়ে,  
অবুঝ অন্তর মোর ব্যর্থতার জপমালা গণে॥

বন্ধুরা বিস্ময়ে চাহে, প্রতিবাদ করে সমস্বরে;  
কেহ বা প্রকাশে উদ্ভা; সকৌতুকে শুধায় কেহ বা—  
কবিত্ব আমার ধর্ম, তাই বুঝি কৌমুদীজাগরে  
পেচকীয় দুঃখবাদ লাগে মোর এত মনোলোভা॥

কেমনে তাদের বলি নই আমি অমরাবিলাসী  
মর্ত্যের সূচ্যগ্র কোণ একমাত্র অস্থিষ্ট আমার;  
ব্রহ্মাণ্ডের সৃষ্টি, স্থিতি, সে-সবে এ-হৃদয় উদাসী,  
উত্থান, পতন মম ক্ষণিকার নিষ্ঠায় অসার॥

বিচ্ছেদ-বাদল-রাতে মিলেছিল যে-শেষ চুম্বন,  
রাকারে বিফল করে আজও তার নশ্বর স্মরণ॥

২৮ জুন ১৯৩২

# ডাক

কোন্ কালে সেই চকিত চোখের দেখা:  
কী জানি সে এখন কোথায় থাকে।  
নিশীথ রাতে তারার চিত্রলেখা  
তবু আমায় তার কাছে আজ ডাকে।  
হয়তো সে-দিন শুধুই দেহের টানে  
তাকিয়েছিল আমার মুখের পানে;  
ফাগুন কেবল বাহ্য বরদানে  
কল্পলতার কান্তি দিল তাকে।  
আজকে তবু আত্মা আমার একা;  
জানি না আর কোন্‌খানে সে থাকে॥

বুঝেছিলুম সে-দিনে, আজ আবার  
এই কথাটাই নূতন ক'রে বুঝি  
ইচ্ছা ছিল তার কাছে যা পাবার,  
সেই অমৃত করেনি সে পুঁজি।  
তার ছিল যা, সব জীবেরই আছে;  
সেই ঋজুতা যুকালিপটাস্ গাছে,  
তেমনি ক'রেই মত্ত ময়ূর নাচে,  
সেই প্রদাহ পশুর চোখেই খুঁজি।  
যৌন জাদু নিমেষে হয় কাবার  
বুঝেছিলুম সে-দিন, আজও বুঝি॥

তবু যখন মধুফলের বনে  
জড়িয়ে ভুজে অদৃশ্য তার কায়া  
অতল, কালো, ডাগর সে-নয়নে  
দেখেছিলুম তারার প্রতিচ্ছায়া,  
জেগেছিল তখন আচম্বিতে  
ভূমার আভাস যুগল বিপরীতে,  
চিনেছিলুম অবাক সমাধিতে  
মহাবিদ্যা যে, সেই মহামায়া।

ফাঁক রাখেনি কোথাও ত্রিভুবনে  
সাধারণীর সামান্য সে-কায়।

বসন্ত আজ সুদূরপর্যাহত,  
হেমন্ত ওই দোদুল অন্ধকারে;  
চুকিয়ে দিয়ে পাওনা-দেনা যত  
দাঁড়িয়ে আছি খেয়াঘাটের পারে;  
চপল ভ্রমর অন্ধ নেশার ঝোঁকে  
আর ফিরে না প্রলাপ ব'কে ব'কে,  
মনের চাকের মধুর নিরালোকে  
আজ সে ঘুমে অসাড় একেবারে।  
দুর্গহ সব তত্ত্ব ওতপ্রোত  
এই নিরাকার, নিখিল অন্ধকারে॥

তবু আবার তারার প্রদীপ জ্বলে  
আমায় প্রাচীন সংকেতে সে ডাকে।  
এগিয়ে গেলে জ্ঞানের বোঝা ফেলে  
তার দেখা কি পাব পথের বাঁকে?  
আজ বুঝেছি সে-দিন ক্ষণিক ভুলে  
উদ্বায়ী দান দিইনি তাকে তুলে,  
তীর্থে যেতে রাজীবচরণমূলে  
কাটাইনি কাল দৈবদুর্বিপাকে।  
সত্য কেবল দেহের দয়ায় মেলে;  
তাই সে আমায় ডাকে, আবার ডাকে॥

২৩ নভেম্বর ১৯৩৩

## দ্বন্দ্ব

মনেরে বুঝায়ে বলি মৃত্যুপাত্র নিশ্চিত ভুবনে:  
গ্রহ, তারা, নীহারিকা ধায় নিত্য বিয়োগের পথে;  
বস্তুর দুর্দান্ত চিতা অনির্বাণ শূন্যের সৈকতে;  
কালের অদৃশ্য গতি ব্যক্ত শুধু বিপ্লববর্ধনে॥

সালোক্য, সাযুজ্য, সঙ্গ, সে কেবলই সম্ভব স্বপনে;  
বিসংবাদ, বিকর্ষণ আর্যসত্য জাগ্রত জগতে;  
ছুটি মোরা মর্ত্যচর আত্মঘাতী আবর্তের স্রোতে,  
ফেনিল সম্মোহে মেতে, লুক্কেন্দ্র নাস্তির শোষণে॥

হার মানে খিন্ন মন। দেহ কিন্তু অক্ষয় উৎসাহে  
পরিব্যাপ্ত ব্যবধানে রচে সদা বাসনার সেতু;  
তন্ময় মুহূর্তমাঝে অনন্তের আবির্ভাব চাহে;

দেখে জন্ম-মরণের কণ্ঠাশ্লেষে বাঁধে মীনকেতু॥

আজিকে দেহের পালা; রিক্ত শেজে শুয়ে তাই ভাবি  
হয়তো বা তারই কাছে প'ড়ে আছে অমরার চাবি॥

৪ সেপ্টেম্বর ১৯৩২

## প্রতিপদ

সমাগু সংরক্ত রাত্রি।-শ্রান্ত দোলপূর্ণিমার শশী,  
যৌবনের শিখিপুচ্ছে বিমণ্ডিত বৃদ্ধের সমান,  
ঘুমে অভিভূত হয়ে করে যেন হঠাৎ প্রমাণ  
আকাঙ্ক্ষার বাচালতা। জাতিস্মর উদ্বেগের মসি  
প্রাগুয়ার পাণ্ডু মুখে অনর্থের অপপাঠ লিখে:  
থমকে সে মধ্যপথে, তুলে ধ'রে নিবাত প্রদীপ  
তাকায় গন্তব্যপানে; নীড়ে নামে, দেখে, চতুর্দিকে  
বাদুড়-পেঁচার ঝাঁক। অপুষ্পক ত্রিভঙ্গিম নীপ  
দুঃস্বপ্নে প্রলাপ বকে, শব-শিবা-সর্পে পরিবৃত।  
সমাগু সংরক্ত রাত্রি; চূর্ণমুষ্টি ধূলিধূসরিত।

কষিত-কাঞ্চন-কান্তি, সুমধ্যমা কুমারী, অহনা,  
আর ফিরে আসিবে না অলজ্জিত স্বচ্ছ শ্বেতাস্বরে  
দীর্ঘল তনিমা ঘিরে, অরুণিম বরাভয়ে ভ'রে  
নীলকান্ত সুধাভাণ্ড। বিমর্দিত ফুলের গহনা,  
পর্যুষিত কারণের উগ্র গন্ধ উতল নিঃশ্বাসে,  
সর্বাঙ্গে পাংশুল ক্লেদ, তন্দ্রাবিষ্ট পৃথুল পৃথিবী  
নির্জন নৈমিষারণ্যে। ইতিমধ্যে সন্নত আকাশে  
রুগণ আলোকের বীজ, পুরাতন, পীত, পরজীবী,  
উগু করে ধবংসকীট। আত্মহারা স্বয়ং সবিতা:  
পৈতৃক প্ররোহে আজ পরিপ্লুত অজের দুহিতা॥

সুবর্তুল পুষ্করিণী পরিপূর্ণ কানায় কানায়  
অচ্ছাদ সবুজ জলে, উচ্চকিত নবদূর্বাদলে  
অবরুদ্ধপরিবর। চিত্রার্পিত মুকুরের তলে  
দিগন্তের যুগ্মগিরি শোথসান্দ্র পীবরতা পায়  
সূচ্যগ্র অণিমা টুটে। মায়াময় সে-ছায়ার কাছে  
ভাসে এক মজ্জমান স্নাতকের শৈবালিত দেহ  
হরিৎ হেলক্ষেঃ ঢাকা; নিরন্তর কাকে যেন যাচে  
অনিকেত চক্ষুদয়; সুতা-কান্তা-জননীর স্নেহ

অসপত্ন আচম্বিতে উৎকর্ষিত মুমূর্ষার তার।—  
পুরঞ্জিৎ কুরুক্ষেত্রে উবশীর শেষ অভিসার॥

শত শ্রেয় মরুভূমি—সম্মার্জিত সন্তপ্ত সিমূমে;  
বন্দ্যা ফণিমনসায় কণ্টকিত, বিষাক্ত, ধূসর;  
পরিত্যক্ত মীনরাজ্য, নিঃসলিল তরণে উষর;  
নিরিন্দ্রিয় মহাশূন্য, উদাসীন উদ্বায়ী মসুমে।  
অতিকায় কুকলাস অস্থিসার রুদ্র পরিপাকে;  
প্রপন্ন অজ্ঞাতবাসে পাশবিক পুরাণপুরুষ;  
শিখরীর মন্ত্রগুপ্তি পঙ্গু-করে মৃগতৃষ্ণিকাকে;  
উন্মুক্ত গগনে জাগে নিরঞ্জন সত্য, নিরঙ্কুশ।  
নির্বাণ সর্বতোভদ্র: প্রতিবেশী নীহারিকা যত  
পলায় সংসর্গ ছেড়ে। অকস্মাৎ ত্রিশঙ্কু স্বগত॥

৫ এপ্রিল ১৯৩৭

BANGLADARSHAN.COM

॥সমাপ্ত॥